


KOTAVUSA VIRDA


KOTAVAFA VIRDA VESTASA VA TAMAVA IS ARAYEEM MU AYIKEEM

Kotava, tela tamefa golerava
Va ina kosmac !!

Taneaksat ke 2023

3^e otuk






IZVA IS ARAYA

Erebuni ~ Ralma ke Urartu gazaxo

Erebuni ralma (armenavon Էրեբունի) tir ralma ke Urartu tigisa koe Yerevan refa widava koe Armena. Gan Argishti I bak -782 AGJ volmiv zo vegeduyur ise gejon is nendason yordayar. Inafe ontine tir vas 1017 m- vamoe bireka. Tiyr tana jontika ralma kolnayana keve lentefa jowa koe Ararat krant ise tan lozolonaf gaderopaf is skapaf is arayaf aveg ke gazaxo. Yerevan witaft yolt tir vey Erebuni. Bak -VI^{-eafa} decemda AGJ nope dratcera ke Persa zo jovleyer. Radimi felira ke Persa, folkayenafa widava zo vulkuyur. Tici XIX^{-eafa} decemda gire zo kosmayar. Yerevan tir kelu ke Armena mali 1918 moi Taneafa Tamavageja az mali tena ke TSSS bak 1991. Erebuni tir tana lerdoya losavsafa ralma ke tamava.

Izva

Erebuni gan Argishti I gazik bak -782 AGJ zo zabduyur. Tice venta yoltkirafa gu Arin Berd vamoe azeka ke Aras kuksa zo vegeduyur, zanudatason va sayakafa ralma is nendatason va lentefa jowa ke Urartu gazaxo. Ton « envayana wetce ristulaf is alkaf avegap dem gazapafu kelu » zo pimtayar. Sedme Margarit



Israelyan, Argishti I gazik va vevedura va Erebuni bokayar radi-mida va gola lente Yerevan is talte Sevan uzda al levrotiyir. Stolenik gralomeyen (ayikye lidam ayikya) bal banyon tawuk ta



vegedura va widava zo malsaveyed.

Bal rawopafa brinuga stayana gan Konstantin Hovhannisyan armenaf opik bak 1950, toloy rapor dem simbakoraf kosuteks koe Arin Berd zo kosmayad, don bata froyasa va zabdura va ewavon bak gazugal ke Argishti I is bana icde vevedura va olkxe gan Sarduri II nazbeikye is direik. Argishti va oltavaf kosuteks koe Tushpa aru kelu ke gazaxo iskeyer, i va kosuteks miwas da va 6600 gejaft daginik ke Khate is Tsupani askiyir, frofatason va warzafa widava.

Larde jontik xim tiskis va Erebuni kosuteks, bal joxara koe Teishebani vegungafa widava zo trasiyid, pune etrakara va ageltafa tigira ke Erebuni koe Arin Berd lanviele awiyid : rotir pozla kosmayana gan Hovhannisyan bak 1950 moe venta xuye tigiyr. Arti anyustda, bak 1958, kevudara tere zo tenekayar isen areldafa sazara zo gruyeyer : bal rawopafa joxara, ar kosuteks spaf ke Argishti I icde zabdura va

Kotavaf Izvugalayak [-1000 – -800 : Taltefa Asia]

Sinka is Anameda — Irubara is Vevedura — Ckane is Gandura — Yamba is Miga

NUVA TA BURMERA

Koe suteks ke Mesopotamia, 20 bludinda is 100 aabreinda is loa 300 beginda zo vuested. Atela keve tey zo burmeyer ; ar blot zo lembieweyed oke koe cade zo burmeyer. Gubeon sinka tiyr sudafa.

Fomek ke atelaxa
gretcyan moe
toaz kum kuritca,
Mesopotamia



TUVEL IS TUVELI

Koe Pokefa Roneka, taneaf tuvel me tiyid titickayan moe mask vols gerot dem ekwa koplekuyuna gu raporafa ladiva debalteyed. Granaf tuvel ke berma ke Balawat (Iraka) kolnayana gan Salmanasar III (gazayas wali -858 is -824) batkane fliyid.



Iyekotafi pozlaki ke tuveli
ke Balawat berma, Iraka



moe Arin-Berd venta en tir.

Erebuni dum aryona widava ke Urartu ke bane sare kare bargentimaf zovdom vawale ontinafa rebava vas 10-12 m- ticeon zo veveduyur. Kadimeon kolna tigiyyid voke yona istefa is koefa rebava tisa kum burgi ik drelk ik inta ik tawot. Argishti va bermapa veveduyur isen joxara va seg va anyone katcalafe xe don brivakirafa magafa bonta is dopawa tarizana gu Haldi is virutsayana ralma is vreda is kenibexo is emaxo kosmayad. Koefa rebava gu lingeks va alkafa ok mealkafa nakila kulon zo yunkeyed.

Diref gazik ke Urartu va Ereuni wetce sokexo bal sayakaf tawuk kev lentef volnik faveyed nume va migexasa vevedura va ralma wan malskuyud. Sarduri I az Rusa I va Ereuni wetce greelt ta levrotira va lentexo dere faveyed.

Bak -735 AGJ Sarduri II gan Tiglat-Pileser III Assur gazik vatalte patecta zo ceneyer numen bata surtera tiyir viank ke izva ke Urartu viele va roti is digiks toz drasuyur. Isen azon bak gazugal ke Rusa I nazbeik, nobafa diltura ke Kimmeroy lentronu gazaxo ko Ararat krant va tutenara va skapafa tegira is diliokafa vonera nekiyyid. Ristulafa fabdura zo skuyud numen zolonuca ke Ereuni joke vegungafi Argishtikhinili irutaweyer.

va Ereuni keve jola aykayana bene savsafa rebava zo kosmayar. Batkane mali 1958 gruyera va tigira ke Ereuni

Gola gan Haxāmanišiya gindaxo kalion zo feliayar. Gejopafa debala ke Ereuni soe me irutaweyer numen vanpiyir zolonaf aveg ke bowesik ke Armena.

Nekev jontika tolgenira gan azafa divefa gija-rotiaca, widava me zo jovleyer ise remi yona direfa decemda dun tiyir saneliakirafa, tere divlizeyeson can ralma. Batcoba di vanpiyir Yerevan widava. Bak lardeaksat ke 1968 kimbara va 2750^{eaf} ilanuk ke zabdura va Ereuni kadayasi Yerevan zo fiptayar.



Divak

Vevedura va bargentimafe dre ke Ereuni ralma tice Arin Berd venta ontinon gu 65 metre, moe jadifa darka vas mon anyustoy iray, ton gejopafa debala vamoe azeka ke Ararat is nelkafa joya vansasa va widaki. Anameon rebavapa kum granafa jola zo veveduyur. Ekwa tir ontinafa gu toloye metre azen moeon rebava vas 7 ik 8 metre kum tawotafa norka is giskis sekol vas aluboye metre sotre tanoy jon anyustoye metre. Dalafo kolanixo ke ralma gan ontinaf rasek zo nendayar. Va idjaf kusk ke ralma vas 14 x 17 m-stayar.



Nuyafa ewava male internetxo : <https://commons.wikimedia.org>

Internetxo : **Kotava : langue, littérature / ava, suteroteem**

<https://kotava1837481.wordpress.com/2018/11/08/izvugalayak-1000-800-taltefa-asia/>

SABEROPA

Kaza koe Mesopotamia va elimaf aldobolk dineyer kiren dodera tazukon gu lanyona tokoda dem dilgava ik lut gubeon zo skuyud. Favena aldoxa tiyid bolkon gu tevsana (jonkota ke 60). Tana seyta ke Nimrud (Iraka) va Asurbanipal gazik disukes va dodera va culiek nedir.



Pinta ke prast ke Rassam, Nimrud, Iraka



Raporaf toaz, Shamash dopewa, Sippar, Iraka

FIPTAYAMBA

Nabu-apla-Idina gazik ke Babilim (gazayas wali -887 is -855) va bat toaz kimbas va renzara va balumaks kaatoes va Shamash awaltaf lorik al isker. Sedme krent, balumaks male kuritcafa teza xuye kosmayana zo skuyur. Martig ke gretcaks va tel yazgayan koe Babilim weti decitda vektar.



SUTEROT



Va sinyona skeura al kalí. Abdion va sinyona abduabara ixam al katcalá, i va sinyona naca inde co-yoltá. Va yona bogara dere sodikid. Lanbat Xipehuz tisik va lanban kotviele sokilnir ise waldon. Sinyona zidera nutid tizafa. Sin va sint klantad milinde rodizvet viele va sulemap ok ayik diltud, ise bata doaliera pu jin al taved da mekon sotid volawalkolaf voldum taneon djuprofoliyí, lecen tolon ok baron va Xipehuz tisik xonukas bal manyona kakevera al wí, i va xonukas trabe lubes az licawes az turaporawes. Va konakbata abigafa awalkoda tciamon al vidé, nume va kosmara va tuwava ke Xipehuz tisik dire rotir rozanudatat. Sina tid blafotamaf vewuk mebelon deraykayan is umicakiraf gu faltafe tride.

Larde Xipehuz tisik sotid awalkolaf, al maltrakú da va sin ape rolyumat ise rocenet, nume va enk dem lyumasa bagalara fure pulvitina re al boká.

Larde Xipehuz tisik sokayewad uminde reme danca ok dace kadime ulimap zo rokozwid (lecen robudapa va sin kotliz malstir ise gu intafa vannira walzer), pune va int ko aalxo konakviele al rotarpumá, dirnusun va kaliuca ke jinaf okol.

Batlize, al lakosmá kase va brava pu int givegedud, vexe welidá da batenide al rodjé. Va rapor is ruxa somelizid ise nutid ezef gu kota kramafa is rowina rabinda, i gu antafa raba ayon dizvena. Acum va meko ervo dadid, sugdalon gu ewa minon gaana. Arse iluon me rotatat : kot sulem royategayas meuzayanon gan Xipehuz tisik va int al giwodackar, ise jontikviele al tí vrutasik va batcoba.

Milinde Pcexu volkalaf grelt ixam al katcalar, va lanyon rietavaf karniz somekaiknid ; batkane sinafa tegira zo kimar. Vexe bate ninke tandatandon is aksataksaton tire al divlized. Va lazava al gonaneyá.

Okie, bata lazava anton nutir bifa va dofa laumara ise, dum cuga Xipehuz coba, tir merogildana gan ayafa gruuca. Klioton, batse mwa : kima ke Xipehuz tegira baxakon gu ota ke tisik sotumantar, trabe vielu bliara va warzaf tisik tir, pune divlizera va jowa dere tir ; vexe liedje ota me betar, pune kot tisik va irubaxo gaano pu zaavikeem gan cobapo (?) vol rodekaiknir. Bata vexa, va doskeda wal flava is tisik koekafa loon dam tela gundafa katcalana dene ayikeem is sulemeem, ronowimir. Walduca ke bata mwa stekeon al zo wir, lecen vielu Xipehuz tisikeem illaumar, pune inafa jowa baxakon sokablar.

lcde bifa va bliara, va abiccoba gokalí ; vexe bata abiccoba tir adalafa. Taneon, bata bliara balemon tandeon sosokir, levi egaki is vologaki, vox anton bak karapaf mielcek. Xipehuz tisik va sint barbaron katanad, aze bata lospa va tanoya nilon gatelana is fralekapkorafa tere tazukad. Mielcekon batinde zavzagid, is rielcekon kali mirasti ke Awalt. Viele va sint solparsad, pune klubaf is gantakoraf is granaf tazuk ticnid.

Bat tazuk vion tuekemawed, tupinawed aze arti sanku va int gu eribukaf fey ontinapaf loon dam Xipehuz milgik sokartazukad. Arti toloy aksat is konak viel va cugafa vonewera trabe tupinawera zomed. Tere, vanpid oltavaf gu ar ke intaf bliind, dem kseva arapeniwesa kare bartiv is saz is ilkafa rinta isu tazuk. Kaiki konakvielon kotrafa vonewera isu tupinawera, jowa ke tegira sotumantawed. Efe berde, abdi bata crakefa vula, va krileem ke jinaf kiewaf Kwat xuvayá aze va pemaxo kaikon exoneyé.

Xipehuz tisik va kona pesta rotir dir, vexe vol roruyé. Va milflife de ape dir.

Va tigira ke bet sulem ik loeke ayik ilupon sopestaler, nume batcoba tire bazer da inaf pestavileem va minaf iteem vugon lieke vodar. Meviele al wí da va ruxa gu sulem dojer, dace remi goaspil edje coenon gan levpidafi afi ik kseva ke plek ik inafa tirka maninde co-roklayá. Ta trokera va sulemap tol-sanoy ektudad, voxe ta anteyara va zveri ant tanoy soviunsur, nume batcoba va gilderacka va olegara tire welidar, ise bata gildura nutir loon kotunafa dizvenon da kare brutafe pwerte ke wivga sotre sana ok san-tola ok san-aluba va sint lospad. Ison kona lokiewafa dusiva mu dira va vila gundafa gu kona minafa pesta ok sinafa gruuca, tir sinafa tegiinda viele va minyon grelt al dilfud, lecen inc va yona ayikya iku rumeik abiceke dulapeyed voxe va kot gejik volsaason onkayad.

Battode, tel zolonaf uum tir : kas grupavotud ? Volklabuson rodulzé : « Gue, grupavotud. » Ise inaf avot va yona sugda sodadir, ise va konaka dace al lajubasbeksá.

Guzekat, tulon, da kon Xipehuz tisik pu ar co-djupulvir. Batenide, va olyeem ke intaf bitej van dositik opelon govodjur, nume batcoba vere zo zatar. Lanis rozanik bam sovukir aze ker. Nume pulvisik va enk dem trelafa afistaa ben dace welma ke battol kalion soconyukar, kan ayewasira kotviele mal omava, aze bata staa abicedje beneon zavzagid aze relvawed.

Battol, moi ritama, sodulzer.

Inc abdinon gu koti lyumarategi oku skay Xipehuz tisik va batyona staa sokuned : . Viele va jin pulviyid, ise batcoba jontikviele lecen va jin is budaf Kwat dun lavanmecobayad, pune staa is aryona dum tel vamoef ravlem oku blayak zo sogoleyed. Rozasa gubefa staa tiyir nume askiyir da kazawasik di vanvulteyer. Viele Xipehuz tisik gu jadifa katanara zo ganeyed, va staa vektasa va is kaatoesa va jonbarafa nedira ke batyon tisik kotviele dizveyé.

Xipehuz tisik va lodesafa staa dadid, me icde kona tegira oltavafa gu minafa vols yona cugunaykacapa jinon merobasbeksayana. Va sinafa gruwaltrakura va soloksokorafa rieta ape milvodafa gu ayafa rieta vol etrakat !! Lecen jontikedje rozavzad mezekas, anton prilason, nume batcoba va bederacka va trakura tire soxer.

Jinafa tiskirapa poke sin al askiyir da tere damo artazukereem (gaden gan vexeem amidaf gu kot sin num vofan gan trakulotaf ulijdasik) va konak Xipehuz tisik koekackon grupeyé, razdambon va konaka pilkovaca icde ilkafa amiduca... i icde cwe adala ? Va konak snivik someconyukas va kona staa al grupé ; va konak kanespik sutes va dewitcapa ; va konak vetcoyesik isu guvaxiesik volant pulvis is va sint waljoas. Konak djukabuluyud ise antion djukabliyid ; ar va selt denon kaaneyayad ; zugik va snavol ik zveri dun tcabaneyed, ise segayesik va sulem jontikviele umbeyed, iskeyed da in dilon wan bliyir. Kas bata kotcoba va gulafo raporxo gu gesta me fenkur ? Kas me askir da va yona gedrafa dralaca gundafa gu ayafa zaava isu gruaca isu po rovorietat ?

XIPEHUZ TISIK

Va gaara sokud. Va kon debanyes Xipehuz guazik ayewas va staa vanmiae jontik jotik fereon dizveyé aze bantan tantanon tolkalíyid ise gotolaskiyid viele tolaskira tiyir mekotunafa !

Bata tavera tiyid bulafa sedme jin, nume meka arcoba ke Xipehuz tisikeem va jin loeke tuobrasayar, remi mekenibes mielcek loeke tudwisayar. Italk ke bula, bak bat vanafiz ke zaava, cwe batlize fu rofenkuwemeyer, kona opelafa is taneakafarieta batlize rotir di bimileyer ise va alavotsa ke bat mielakap mu jin fu koafiyir. Gue, mecoba va jin vogiteyer ; va bata gaara konaktandon tcokeyé, va jontika remgrupera yovayá. Va presafa afidinda ke benelafa tuwava ke Xipehuz tisikeem jontikviele fogralombeyé, i va volropestalena afida, i va belikafa soloksaca, voxé kaxe jinafa kimtafa grugildara wizuyuna gu cot meviele lajuponkayad !

Pokion al kalí da jontikedje al foliyí da Xipehuz tisik sotir awalkolaf. Voxé oye vilara bata folira wiyison va konaka xonukara bak yona kakevera dene Xipehuz tisikeem, va sinafu robakanu u efe laganeyayá nume batvielu va kon vilas mergil kotvielon lasutrasiyí lecen Xipehuz tisik laumapayad ote, vani geon is lenton is talton kaiknira va Ksur aalxo, va azeka vane roneka toz kodubieyed. Kaxe arti abica doca, va ayik gu inafa tawavafa oga di co-divdigiyid.

Acum va int gu poxa ervoayá, aze, kotviele Xipehuz tisik va aalxo divniyir, vome poxasoluma, kulmeyé aze va poxaxa kabuyú. Va mek daneckeeks batkane seotayá, beka va kot kulmen tisik gu kot pak ke sinafa welma don dace afiu zomeyé. Sin va jinyona zomera mekon nuvalmayad nume mek somangiyir enide va beto jinafo mimadjo taruteyer. Arti tanoy yovas aksat, pu int gowelidayá da poxa va mecoba kev sin sorotir, nume va bato ervo jovleyé.

Va tra nariyí. Ba jinyona taneafa kabuna tceka, va kivapasa pestaka dene cug Xipehuz tisik kosmayá lecen sin mangiyid ise kaike tcekasoluma zavzagiyid, cugeke taruteson va jin. Va kon anyustkon giopon lasuguzayá. Bak anyusteaf viel, Xipehuz lospa tce divburena gan intafa tcabanesa lujuca, onkason va listaf rayol pokoniyir. Ipeson tcekayá, seotason va mek rabaten daneks, aze lospa tcastaweyer edje wan onkayá ise va werk ixalayá. Moida va ironokafa tceka al kabuyú, sin kotote kaliapon kotlizu dimniyid aze va jin cugon ivamudayad voxé tuke zultafa kaliuca ke laspedaf Kwat me xonukayá.

Bata stuva va cuga melanera isu pokolera pu jin iskeyer ; remi tanoya safta zavzayá foyokaf, eglus koe klubuca is aludevafa riwera, i koe rukuzaf skerses uum rotaloyas va moda is tukotras gu belcon meja is puve. Tokdume Xipehuz tisik va jinyona tceka kivayad ? Ison kasdume melo jinafo jontiko mimadjo uzayaso va tcabanesik va mek daneckeeks al daskiyir ? Jinon grupen pak ke gruuca ke nik va lazaviskafa eaftuca me rosazdayar. Volson, batcoba poayar da guzekayá da tceka, kabuna katecton gu pilkovaf gropeem, ape tiyir crakefo ervo kev sin. Voxé bat gropeem tiyir tok ? Robakanu u ke Xipehuz tisik tiyir toku ? Bam levgon trakura fiyir da bitej sotir gotuzan. Tanwexon laneyé, skeuson is mewison. Azon ilfoliyí.

Kas kan poxa, konakviele, va bat mukot me al kulmeyé, me al uzayá ? Tokdume tceka co-tir fikuntafa loon dam poxaxa ?...

Okie, tiyir miel, i volrosaben bup, i intyon ribiegaf gum plen vamo tawava. Ise jin, ton taka koe nubeem, klokayá, ton takra mielakafa loon dam miel.

Krapol toz ieyer, nopalol koo azeka laniyid, voxé gire pokolesi afimi va jin koafiyir. Su trakuyur da poxaxa tiyir pwertackafa voxé Xipehuz bitej pinopapaf ! Rotir, ta keskotuca, tisik zo govanludevapayar ise kan opafa tceka zo remruyur nume bam inafa eaftuca lente tceka

Wori Wega vamoe nael vion sokaameniyir, vanafiz tiyir boref, ise leguca, remi konak bartiv, koe jinafa kerava va tamava ke swava komodayar.

Bak konak azaf viel, ervokiraf gu tra, va Xipehuz tisik dun onkayá, ko sinafe anambe ilon lieke dam proyuca noveyer. Vexe kot va jinafa dılfula taruteyer, sumeon tigison, kaıke tcekasoluma. Me roguzekayá da va int di skayeyé, lecen sinafa zatatca noveyer da va jinafa tigira reme lirk roderabateyed.

Moni tena ke alubeaf viel, bifa sokiyir, miv welidatasa da Xipehuz tisik sotir rokonjes is rotukiewawes tisik dum ayik. Batsielon, nomon, Xipehuz tisik va jin ins vanniyir, kan bata kaliuca dure laumasa gilikatcuna ta dılfula. Akoyen, ton sionasa takra, va tra nokeyé. In, abdunison, oltavaf gu folvukafa briva koe awis siel, kaik soluma riwe artniyir. Azon, edje djuprotcekayá, woltendanon wiyí da in rwodeyer nume ware abdunison va bitej palseyer. Bam va Kwat biwe rotcepasiyí nume va uzara ke bat crakef kevelik krulayá.

Okie, bata tiuracka numodovayana gan mek Xipehuz tisik, valeyda va ilkafa gandura ke volnik isu ilkuca ware danediyir, va toloya rieta tiaveyer : taneon, va robakanuca ke Xipehuz bitej bexe ebokon al ovayá ; toleon, leon bristunon, ede mila pendanaca gan kottan zo co-vanikatcur, pune va jinafa lagara di co-tuwavdapar, dace rotir merotison.

Wori, kaiki jontika sugara va kosmara va ageltuca, pestaleyé da jinafa takreluca lent vakor laumayar ise va rukuzuca adrafa gu vetrovgara kan jinafa swava rovepokoleyé.

VI : Toleafa rekola ke neva ke Baxun

Ko intafa antiuca dimlaniyí. Anaxre, bareafe nazbeikye ke jinaf Tepai yerumanik, tiyir gıjarotif ervoiasik. Benplekuyú da in va tra zultun rodekabusa di ilbodeyer. Va gama ke waxam aal, olgafa dam azil, nariyir, nume iayana tra tiyir gıjarotifa balemon loon dam tela ke Zankan vartesik, i ke tel lopof tcekasik ke decitoy grelt. Mel blis ayik va ina co-rodekalatceyer. Vexe va tca al getcayá nume larde Anaxre nope jinafa trakura al kobayar, efe bata datafa tra gan ayikya zo rokalatceyer.

Okie kotvielu tiyí bagalaf gu kabura va flexa is tceka, maninde arti konak viel va ervo iayano gan Anaxre nazbeik kotunon gruragrupeyé, nume va mek mukot di keluyú, i va dace kon tıguaf dum nefta ok kon talas kalion lion dam flaweza.

Vanion, ko Ksur moe Kwat dem teykas iteem gire lakiyí, aze aname volnikeem ke ayik gin mwarneyé.

Enide tudir nusayá, kotviele kona sinafa lospa va jowa vanniyir, pune kan jinafa gubefa tra jontikote tcekayá, voxe tceka tolke vom sin lubeyed. Sin va tageltafa ervosoluma batkane tavuyud nume en foliyid da iyela vome lana titickafa soluma anton tigiyir. Wori, va lana budaxara

Xipehuz tisik, ke J.-H. Rosny Aîné (3^{-eafa} zıxa ; wana titisa koe diref otuk)

Xipehuz tisik, gestaropaf berpotam (1887) ke J.-H. Rosny Aîné belgaf suterotik
Xanto : *Les Xipéhuz*, francavon, kalkotavayano gan Damien Etcheverry, 2014.
Dotay : Kotavaxak dem Suterot.



Elin Danielson-Gambogi (1861-1919) ~ Suomiaf lingsik

Elin Danielson-Gambogi ba 03/09/1861 koe Noormarkku widama koe refa Suomia kobliyir. Ba 31/12/1919 koe Antignano koe Italia awalkeyer. Tiyir geltrevaf is tuwavevaf lingsik.

Jotarugal is vayara

Elin Kleopatra Danielson tir vey sayakikafa is flibikafa yasa. Karl Emil Danielson gadikye is Rosa Amalia Gestrin gadikya tid arayakiraf. Voxen yasaf viel bak 1871 konjer numazen gadikye direilanon kser. Nekev erbage, gadikya ke Elin va vayara pu nazbeya lasudoder, pomanon gan Mauritz berikye kaikion erbon wan zobetese va Elin. Tison sanalubdaf, in va zovdaropafa bema ke Yambaf Cultim ke Helsinki denfir lize va zovdaropa is siak is patectoyafa lingeropa isu rigelafa vayar. Dene yasegafa bema ke Adolf von Becker va vayara linter aze bak 1880 vanpir tavesik. Va taneafa wonara mililanon paker.



Danielson klabur da va yambafa klepa di koaskir. Va tavera is vayara kali 1883 ektudar ugale va filavcek ta vayara koe Paris seotar. Va lok ke 1880-e sanda tiskir, vayason dene Colarossi cultim is aryona yasegafa bema. Ke inyon tavesik, Gustave Courtois is Raphaël Collin tid, vaxis Auguste Rodin taves va geaki ke balumaropa.

Toza ke klepa

Dum jontik lingsik ke Paris, bak konak idulugal Elin Danielson ko Bretagne gola lapir, i ko tulon Pont-Aven, enide va patectoy di linger. Turestanon gan Julien Bastien-Lepage tuwavevik, inafa luistava loeke tuafiawer. Kaikion koe Suomia dimdenlapir, blison koe Noormarkku ok Helsinki, ise va Önningsbykolonin rijay denfir, i va rijay dem suomiaf ik sverigaf lingsik va sint kabelcas koe Åland tursia. Va Victor Westerholm kali awalkera di dun dogoler.

Elin Danielson va yona direfa tanda koe Suomia ok Franca tiskir. Mali 1887 va konaka wonara koe Suomia paker lize nope intyon ayikyaf delt ton entafa ok dace mewalnafa ok zugiafa nakila zo katcalar. Loloon malyopason va debala ke ayikyeem koe selt, volrapalur ise va konake yambikye don Gustav Vigeland norgaf balumasik skedegar.

Koe Italia

Elin Danielson bak 1895 ko Firenze kan vayarafilav lapir lize balemaksaton di tiskir. Direilanon gire lapir aze va Firenze az Antignano wida gee Livorno parmon koirubar. Bak 1898 va Raffaello Gambogi yerumar, i va italiafe lingsikye tise leon klaafe gu san-barda. Bata warzafa anameda va lingeropa ke Danielson turestapar isen tolonga va int belcelon turestar. Va konaka wonara koe Italia is Franca bal yona direfa tanda paker. Elin toz zo tukiewatcar. [...]



Recela 2 : Kawasaki

Recela 2 : Kawasaki tir bareafa gweta ke sposaf gwetak vergumveltkiraf gu 53 recela ke Tōkaidō vawa, Tōkaidō Gojūsan-tsugi no uchi), zovdayan gan Utagawa Hiroshige niponaf yambik, is taneon piskuyun bak 1833-1834 gan Hōeidō.

Tōkaidō vawa tiyir vawapa wale Edo (re Tokyo) tiso kelu ke Shogun patectokilik is Kyoto gindafu kelu ke Nipona. Sareon gu Hiroshige, kotafa soluma tiyir vas mon 500 km- numen lanis koyasik bad mon toloya safta exuleyed.

Hiroshige va varaf gwetak dem 53 recela ke zalor zovdayar. Bata gweta (Ukiyo-e tazuk) tir lumkirafa gu 37 × 25 cm- (ton Oban breviz). Tir bareafa ke enk ise va greelt koe Kawasaki kaatoer.

Greelt ke Kawasaki

Greelt koe Kawasaki tiyir toleafa recela ke Tōkaidō vawa.

Kawasaki re tir widavapa koe vageeon rea ke Tokyo.

Bat greelt bak 1623 zo exoneyer.

Gweta va koyasik remplapis va Tamagawa kuksa koe ankittota is kesik moe bana lentefa omega nedir. Fuji tculk ileon zo rowir.



Xantofa piskura : 1833-1834 gan Hōeidō



Piskura : Gyosho enk, 1841-1844 gan Ezaki



Piskura : Reisho enk, 1847-1852 gan Marusei



Utagawa Hiroshige lingesik
(1797-1858)

Varaf teliz tigus koe Kotava Xadola dene Wikipedia.

~ Banliz [https://avk.wikipedia.org/wiki/Recela_2:_Kawasaki_\(gweta\)](https://avk.wikipedia.org/wiki/Recela_2:_Kawasaki_(gweta))



TAMAVA IS TAWAVOPA

Aldabra rinca



mante vas lentugeon 14.5 km-.

Tigisa vatalte India welfa, Aldabra rinca tir ke Tamavafa Gadakiwega ke UNESCO mali 1982. Va cugunaykafo tuwavaxo tadler ise vas kunoya ribiega ruldar.

Aldabra : tanaxo koe tamava

Dere yoltkirafa gu Aldabran, Aldabra rinca tir tela tuon-tinayana rinca koe tamava. Vegetalte Seycela tigrir, arte 1066 km- getalte Mahé dalafa ewala ke patecta. Cugafe abrotce ke Aldabra rinca tir vas talturonon 34 km-, isen cugafe

Welmot ke siday tir vas mon 155 km², isen varaf welmot don anoda tir vas 350 km². Aldabra rinca tir ke Seycela tursia, is dem balemoya drakafa ewala sol vwepafi remasti. Vas dambafa anoda ruldar, isen vawale drakcanak tigrir.

Aldabra : begamaxo ke kusafa imboza

Aldabra rinca dere tir dalafo begamaxo ke kusafa imboza (*Chelonia mydas*) koe India welfa. Sina tid vas mon 150 000 blisa moe rinca. Ostik rinca va tela logijafa sanelia ke gulafa imboza ke Seycela (*Aldabrachelys gigantea*) bravar. Voxe dere va telo logijafu boniaxo ke bempok dem kerafa oda (*Phaethon rubricauda*) ruldar, vovis apsaka (*Fregata ariel* is *Fregata minor*).

Aldabra tir nendoyenyen tuwavabolc koe India welfa. Bumuca is isk ke elupkafa ayafa kerelera isu tegisaca al jupad da dunolafa katca isu ruxafa va lana kotakoluca al voned. Tulon ipomay (*Dryolimnas cuvieri*) tir bocafo katca megrutalasa zverifa katca ke taltefa India welfa.

Lidawicka



Drankafa domega koe Aldabra

Lidawicka ke rinca tir bwafa ise tir dem toloy cadim. Mali balemeaksat kali teveaksat, iklava geronon suker ise va rodackaf is fedaf gael vanstar. Mali santaneaksat kali bareaksat, lentaltufa ramba va loa sazafa abda is lodontinafa yanka vanstar. Nekev apelckek bal rambugal, tandeafa muvareka tir axackafa ise koe bat pak ke India welfa arapeniweper (tandeaf mialuk vas 1100 mm-).

Abica ayafa tegira

Rinca gan abic kobasik ta onara is midura va xodi ok vuzoga ok wageya zo kereleyer. Voxe va taniafa is elupkafa ayafa sanelia vugviele emudeyer. Golde meluveduca ke ewaleem is

vakorkirafa vansara don tulong linuca is isk ke lavada.

Moe rinca, ayafe levedre anton tid dem aneyotca is rawaks ke pemaxo moe Picard ewala valenttalte rinca. Bat rawaks tid don awalkikxo dem siniaf kobasik, is don flint is ujama. Refa kolna kare anameda guyunded : tral gan awalt zo warzer isen lavada zo dimnarir.

Aldabra : sidayafo tuwavaxo

Rinca va sidayafo tuwavaxo koe pulara ke Tamavaf Grustaks ta Tuwava tadler, wetce « Rodumaf beripxo ke Aldabra ». Dere tir dem vwapa ke ruxafa is dunolafa kotakoluca. Numon tir tan logijaf ewalaf bolk ware ketackaf.

Dratcera moe debak azented


Bumuca is anameda plabafa gu ayik va ayafa tigira al lajupilfid ise va tuwavabolk al nendoyed, voxen ara dratcera awid. Tulong tigira ke sulem dum tovol is bulol is wil voxis lana vultuginda moe rinca. Tire bata katca va zverif sanelieem isu imbozaf voxisu aalaf voyapad.



Gulafa imboza ke Seycela (Aldabrachelys gigantea)



Dervek koe Aldabra



Lae dem drakafo kalkaxo

Aldabra tir nendoyenyen tuwavabolk koe India welfa voxen ticnira ke biravwa, is laumara ke yanka ke lavek, is krimtafa giatera, voxis kaikonara va rinca dratced. Voxis voyara ke koyutasik ok fura va lava gan raz koburen gan ayik.



TELIZ

2^e bu : Erebuni, ralma ke Urartu
2^e bu : Kotavaf Izvugalayak
4^e bu : Xipehuz tisik, berpotam
8^e bu : Elin Danielson-Gambogi, lingsik
9^e bu : Recela 2 : Kasawaki
10^e bu : Aldabra rinca
12^e bu : Liwombura
12^e bu : Kuda ke Aisopos

Kotavusa virda

Virda kotavon sanelayana, nuyon is faston
romalvajana is rorubiana is rotamzilina.
Ickriluyun rokeem. PAG / DE.
Internetxo : www.europalingua.eu/KotavusaVirda
Bu : www.europalingua.eu/KotavusaVirda/3-e_otuk_01-2023
Sanegara : Taneaksat ke 2023. 3^e otuk.

Yunkeks is ewava : ewaveem abugaf gu roka ok
nuyon rotamuzen ok rictayan gan digisik.

LIWOMBURA

Tula va liwa ke lana ombaliwa watson gu alto.
Konaka gokosmana peryasafa ombaliwa.

Xantaza :

<https://kotava1837481.wordpress.com/2018/09/02/un-jeu-de-7-familles-en-kotava-2/>

2

Loma
BEWA

ALTO

FR
main(s)

Nuba / nubeem



Nuba : tenafa vila ke ticebewa, dem
mantafi ki solawesi gu pand is otson
aluboy gelt, ta uzara is narira. Ayik va
toloya nuba (**nubeem**) sodir.

ma - nuba - gelt - epita - nimat - nuga

Cigavol is wilye

Cigavol, ebiduyus va wilye, va ovacka ta vumbera djutrasir. Acum buntur da ine mielon dankason is weyonason va kenibera va korikeem mazuker. Wilye kalison da ta tufavlawera maninde sokaskir, va int pour ; lecen divmodason sokaskir da sin va gubefa kobara setiked. Bam cigavol va ar famint dakter, buntuson da ine ilagison va gadikya is berikyeem va tuwava situndar. Dulzer da ton dere batcoba va dulap ke feliik sokoazanir larde tukeon wilya atoapad. « Kle ! ~ cigavol divier, ~ kore venganyal nume vengarsal, jin goldeon me fu getiné ! » nume va ine vumber.

Bata kuda nedir da djukurotus tuwavajik, viele va int gu xatcaxanya me robesar, pune nisanon sorotur.